

Date – 15/10/2025

Time - 18:30 -18:40Hrs

AKASHVANI AIZAWL
REGIONAL NEWS BULLETIN

HEADLINES (EVENING)

1. Chief Minister Pu Lalduhoma'n a bial chhung Serchhip Zuanglêng ramah Changel sawngbawlna hmunpui vawiin khan a hawng.
2. Dampa Assembly by election a chuh tur, rorel lai ZPM party official candidate Pu Vanlalsailova chuan vawiin khan nomination a file a, candidate dang hming pe lut an la awm rihlo.
3. Bihar Assembly inthlan atana inbuatsaihna a kalchho mek.
4. Vawiin khan President hlui APJ Abdul Kalam-a piancham pualin ram hruaituten amah hriatrengna hun an hmang.

<><><>

CM

Chief Minister Pu Lalduhoma'n a bial chhung Serchhip Zuanglêng ramah Changel sawngbawlna hmunpui vawiin khan a hawng

A hawwna inkhawmah hian thusawiin Pu Lalduhoma chuan, Zuangleng ram leh a chhehvelah hian Changel a tam a, Khumtung leh a chhehvel khuaah Balhla chingtu tam tak an awm bawk a. Hengte behchhan deuh hian NECTAR lamten Changel Kawr sawngbawlna an han din a ni a ti a. He laia ram nei, Changel leh Balhla kawr, paih mai mai thin ten an hnawm kha sumah an chantir thei dawn ta . He unit enkawltu tura thlan Implementing Agency APRINS te chu tha taka kalpui turin an beisei dawn a, an tum ang ngeia kan kuthnathawk tute tana tangkai taka an kalpui an duh a ni, a ti.

Ministry of DoNER PM-DevINE sum hmanga, North East Centre for Technology Application and Reach (NECTAR) ten an din Common Facility Centre hi Changel kawr atanga hrui siamna, kuta siam paper siamna, changpat leitha siamna leh savun thlakna Vegan Leather an tih mai siam chhuah theihna tura duan ni a. A buaipuitu NECTAR hi Department of Science & Technology hnuaia Autonomous Institution an ni.

A hawwnaah hian Agriculture Minister Pu PC Vanlalruata leh NEC Secy Pu Satinder Kumar Bhallate an tel a, Lt. Col. Clement Lalhmingthanga, MLA in Chief Minister hi a tawiawm bawk a ni.

<><><>

NH ROAD CONDITION

Tunhnaiah Aizawl leh Silchar inkar kawngpui a chhiat nasat leh tawh avangin darkar 24 liamta chhung khan lirthei 991 a tangkhang.

Tukin dar 8 leh a chanve atanga a let zawnga chhuta darkar 24 chhung khan Kawnpui atanga Aizawl pan bungraw hrang hrang phur lirthei 457 chhuah a ni a. Lirthei ruak, Sairang peng leh Mualkhang/Khamrang inkara tangkhang Assam lam pan tur pakhat mah chhuah a awm lo bawk a, hemi hun chhung hian Khamrang a Assam lam pan truck ruak 621 chu an tangkhang mek a, Kawnpui a Aizawl lam pan bungraw phur tangkhang 370 a awm bawk a, heti hian avaiin Aizawl leh Silchar inkarah kawng chhiat vangin lirthei 991 a tangkhang a ni.

Thu dawn danin Sairang leh Kawnpui inkar kawng siam that hi a chhiat leh nasat tawh em avangin kawng a nal em em a, truck ruak a kal hlei thei lova, tlu leh tang an tam thei hle a, sawrkar chuan Kawnpui atanga Khamrang inkar kawng thawmthat hna an thawk tan a, NHIDCL lamin thawkin PWD in Boulder an ngaihtuah thung a ni.

Hetihlai hian PWD Minister chuan sawrkar laipui atangin kawng siamna tur cheng vaibelchhe 170 leh nuai 96 an hmuh thu a sawi a, kawng chu khawthlang lam tan leh a bik takin Mamit District mipuite tan a pawimawh tak leh an inngahna anih avangin sawrkarin chak takin a bawhzui a ti a, kawng thawm that hna chu hnathawh theih hunah thawh nghal vat an tum tih a sawi.

<><><>

MLA AI TRAINING

Mizoram Legislative Assembly Speaker Pu Lalbiakzama chuan vawiin khan Assembly Conference Hall-ah Mizoram Legislative Assembly Member-te tana buatsaih, Artificial Intelligence (AI) chungchang zirna hun a hawng.

Speaker chuan thu sawiin, khawvel hmasawn zelah theihna leh thiamna sang zelin, technology hman nasat a ngai deuh deuh dawn a, ram hruaitute tana he’ng thiamna thar, AI hman dan hriat chu a pawimawh avanga he hun hi buatsaih a nih thu a sawi a. Mizo tawng ngeia AI lama mithiamte’n zirtirna an pe thei tur chu lawmawm a tih thu leh a bulthut atanga thiam a pawimawhzia sawiin, MLA-te chu he training an hlawkpui ngei theih nan duhsakna a hlan a ni.

Kan corr report lo ngaithla ang.

VC

Ni 2 awh MLA te tana AI Training hi Speaker leh Chief Minister Pu Lalduhoma-te hmalaknaa LushAITech nena tangkawpa buatsaih a ni a, LushAITech Chief Executive Officer Pu Lawmna chuan he hunah hian thusawiin AI chuan khawvel a la thlak danglam dawn chauh a, a lera thuai ai chuan a bulthut atanga zirchian a pawimawh a ni, a ti a. AI chakzia piaah lamah mihringte tana a tha zawnga hman dan an zir tel tur thu sawiin, ram rorelnaah leh Mizoram economy siamthat kawngah a puih ngei a beisei a ni, a ti.

AI Training hawnna inkhawm hi Mizoram Legislative Assembly Additional Secretary Pu Lalthangmawian a kaihruai a ni.

<><><>

DAMPA BY ELECTION

Dampa Assembly by election a chuh tur, rorel lai ZPM party official candidate Pu Vanlalsailova chuan Mamitah Dampa bial Returning Officer pu Malsawmzuala hnenah vawiin khan nomination a file a,

Rorel lai ZPM party official candidate pu Vanlalsailova chuan vawiin chawhnu dar 2 leh a chanve khan Dampa AC Returning Officer pu Malsawmzuala hnenah Dampa AC bial chuh turin hming pe lutin thutiam a lak bakah dahkham cheng 5000/- a dah nghal bawk.

ZPM party official candidate Pu Vanlalsailova chuan kan corr zawhna chhangin Pathian leh mipuite zarah a tlin ngei a inbeisei thu a sawi a, MLA a thlan tlin anih chuan Hriselna kawngah leh thingtlangmi a nih angin kuthnathawktute tana a hlawk thlak thei ang ber tur link road leh kawngpui tha siam te leh zirna tha zawk neih theih nan theih tawp a hma a lak nghal tur thu a sawi.

BYTE

ECI ruahman lawk dan chuan nomination file theih hun hi tun thla ni 21 thleng hun a hawng a ni.

He inthlannaa chuh tum ten hming an la pe lut ve lova Dampa bial Bye-Election a MNF official candidate Dr. R. Lalthangliana, MNF Sr. Vice President chuan West Phaileng, Kawnmawi, Chhippui, Lallen, Saithah leh Phuldungseite tlawhin hun a hmang mek a.

Heng hmunah hian Dr. R. Lalthangliana chuan mipui, lirtheia eizawngtu leh sumdawngte an mangan tawhzia sawiin, "Tunah hian Mizoram chak lakluhna kawngpui ber 'Kawnpui leh Aizawl inkar' chu nanem lovin a chhia a, bungraw phur lirthei an kal hlei thei lo a. Mualkhang/Khamrang atanga Assam lam pan tur Lirthei an tangkhang nasa thin hle bawk a ti a. Kawng siamtute vil uluk lehzual turin ZPM Ministry a phut tih sawiin, Mizoram enkawl bik kawngte pawh siamthat thuai a nih theih nan a enkawltu Minister in tih takzeta hma la nghal turin a phut tih a sawi a ni ti.

Dr. Lalthangliana chuan Bye-Election ah hian thlan tlin a nih chuan, Mamit District chhung inkalpawhna kawng siamtha tura theihtawp a chhuah tur thu te, Dampa bial chhung inkalpawhna kawng hrang hrang bakah kut hnathawktute tan Agriculture Link Road tam zawk siam tura hmalak a tum thu a sawi bawk a ni.

Congress Party Candidate Pu John Rotluangliana MPCC Vice President chuan Silsury, Phuldungsei, Pukzing, Hruiduk leh Mapara a tlawh a, thusawiin, Dampa bial By election ah MLA nih tum luat avangin Chief Minister bialah pawh engmah an tih loh insak tanpuina pe mai tur anga list siam vak vak chuan inthlan zawhah mipui rilru a tih beidawn dawn bakah mi tam tak rilru a ti na dawn a ti a. Chung pumpelhna chu Congress party ah a awm, a ti.



FISH FESTIVAL

Pradhan Mantri Matsya Sampada Yojana PMMSY Scheme hnuaia Champhai zawl leilet a Sangha khawitute leh Fisheries Department, Champhai District te buatsaih "Champhai Leilet Sangha man runpui" chu Champhai Zotlang, Phaipheiah neih a ni a, Fisheries Director Laltleipuiin a hmanpui.

Pi Laltleipuii chuan, Champhai leilet neitu te chu Buh leh sa tharchhuah nana Leilet hmang tangkai tu hmasa, midangte tih hmuhtu an ni a, PMMSY Scheme hlawhtlinpui tu an ni a ti. Champhai District tan PMMSY Scheme hmangin tanpuina chi hrang hrang kum 2020 atanga 2025 chhung hian mi 475 hnehah tuikhuah thar laihna (an pek tawh thu leh hemi atan hian a pawisa faiin cheng Vaibelchhe sawmhnih pathum nuai sawmnga pahnih singriat leh Sangha note dahna tur Rearing Pond kum 2020-2025 chhung hian mi 294 hnenah pe tawhin a pawisa fai chuan cheng Nuai za sawmkua pahnih singthum sangruk a nih thu a sawi. Hei bakah hian “Paddy cum Fish Culture” bikah kum 2020 atang khan vawiin thleng hian mi 482 hnenah pek a nih tawh thu leh a pawisa fai chuan cheng Nuai sawmriat pakua singli an pek tawh thu a sawi a, Champhai District tan hian kum 2023-2024 ah Additional project atan New Pond, Rearing Pond, Paddy cum leh Hatchery te duhsak takin pek an nih tawh thu a sawi bawk.

Champhai Leilet Sangha man runpuiah hian Leilet Sangha chu Champhai a Sangha man pangngai aia zaa 30 a tlawmin Kg 1, cheng 400 in an hralh dawn a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.



BIHAR

Bihar Assembly inthlan atana inbuatsaihna a kalchho mek a. Vawiin khan Prime Minister leh BJP Senior leader Narendra Modia hoin Bihar Assembly inthlan campaign hawn a ni a. He hunah hian booth level-a party worker te nen inkawmhona hun hman a ni a. PM Modia chuan BJP worker te chu an thawhrimnaah lawmthu a sawi a ni. Puan tawh tawh angin BJP hian Bihar Assembly inthlanah hian nimin khan candidate list hmasa ber mi 71 awmna an ti chhuak a. MLA ni lai mi 50 an tel a ni.

Vawiin vek khan Janata Dal (United) chuan an party candidate list hmasa ber mi 57 awmna an ti chhuak a. Tuna minister tanglaite chu inthlan chuh lehna hun pek vek an ni a. Deputy Speaker Narendra Narayan Yadav te, Minister Maheshwar Hazari te bakah MP hlui

Ashwameth Devi te chu list ah hian telh an ni a. Minister hlui Shyam Rajak leh Santosh Nirala te pawh telh an ni bawka tlin puala stamp siam an tlangzarh bawk a ni.

<><><>

ABDUL KALAM

Vawiin khan President hlui APJ Abdul Kalam-a piancham pualin ram hruaituten amah hriatrengna hun an hmang. President Droupadi Murmu, Vice President C P Radhakrishnan leh Prime Minister Narendra Modia te chuan Dr.A P J Abdul Kalam pualin social media lamah thuchah an dah a. Vice President Radhakrishnan chuan Dr Kalam-a chua scientist ropui, hruaitu tha leh ram hmangaihtu anih thu a sawi a. A inngaihtlawmna, thuhnuairawlhna leh zirlaite a ngainatna chuan mitin ngaihsan a hlawhtlir a ti.

Prime Minister Modia pawhin Dr Kalama chu hmathlir thui tak nei anih thu sawiin thalaite rilru kaihruaitu tha leh ram hmabak siam kawngah mite kaihruaitu a ni a ti a. Ingaihtlawmna leh taihmakna chu hlawhtlinna a ni tih tichiangtu anih thu a sawi bawk.

<><><>